

'Sëédhe 'ö Pólö -ya bɔ -Zlan -bha me -nu 'wo Galatö -se -an -dhë bhë 'ö =ne

=Wekadhe

1 ¹Ma Pólö, 'ö n -ma -kë Yesu Klito -bha bɔme 'ka -sü bhë 'ö yaa kë =ne bɔ 'a- wo me -ta 'iin me 'ö n -ya, 'kɛɛ 'ö sü Yesu Klito waa- kwa Dë -Zlan 'ö- bho ga 'gü -an -ta bhë, ma =ne 'ö 'sëédhe 'ö =ne 'a- bɔ ka -dhë. ²Dhegluzë -nu 'wo 'nö -wo -kpa yi -bha, 'ö 'sëédhe =ne, yi -nu 'yi- bɔ Yesu -wun -dhe 'wun gia- -me -nu 'ka Galatö -se 'gü ka -dhë =woë' =ne: ³Kwa Dë -Zlan waa- kwa Dëme Yesu Klito -wo 'glusë kë ka 'ka, 'iin kö -wo ka gbaa =zuöyagluu 'ka. ⁴Klito gia- -yö ö -de -nu kö 'kwa dha kwa -bha -sɔɔn yaa -nu -gɔ, kö -yaan kwa bho pë yaa -nu 'wo 'kpongtaa -dɛɛ -an kwɛɛ =ne -kɔ 'ö kwa Dë -Zlan -zo 'kun -wun 'dhoë- 'ka bhë -a 'dhö. ⁵=ɛɛ, 'tɔbhɔdhe -yö kë -Zlan -bha 'ka =toëpö 'ka! Amen.

'Wuntaɔsë giagia

⁶'Wun 'yö n 'te 'tun -wun giagia 'ka 'ö =ne: Kö -yö -kë -dhë 'ö 'ka -kan 'zodhö -Zlan 'ö ka =dhɔɔ -kë Klito -bha 'glusë =paa' bhë -a -bha 'ö 'ka -dhië 'wun -taɔ gbɛ 'piö ee? ⁷-A -de 'wuntaɔsë 'bhaa gbɛ 'yaa 'dhö. -A pö 'a- wo 'dhö bhë 'ö tɔɔ me -nu -wo -dhö, 'wo- 'piö kö 'wo ka dɔ -gbɔudhö, bhii -wa 'piö kö -wo Klito -bha 'wuntaɔsë bho pin =taa. ⁸A- -pö ka -dhë: Kö -kun 'ö 'ka me gbɛ -bha 'wuntaɔ gbɛ =blɛɛ' -wo -dhe 'wun gia-. -A -de, 'kö -kë =ne -Zlan -bha bɔme do -mü 'ö go dhang- 'gü, 'ö nu, 'iin yi -de =ne 'yi nu 'ö 'yi 'wun -taɔ gbɛ 'ö 'yaa- me 'yi- =blɛɛ ka -dhë bhë -a 'ka 'yi- =blɛɛ, 'dhangga -yö yi 'kun. ⁹Pë 'yië- =blɛɛ' -ka -dhë do yö -mü; 'kɛɛ a- 'piö kö 'a ziö- 'gü do

ka -dhë -nɛɛ: 'Wuntaɔsë 'ö 'yaa- mɛ 'ö 'ka -we -a -wun -bha bhë -a 'ka, mɛ 'ö 'yaa- -wun -blɛɛ'- ka -dhë, 'dhangga -ya 'kun.

¹⁰Kë- wo 'dhö bhë, yaa kɛ -nɛ n -de 'tɔ 'a- =mɛɛ' -na bhë. -Zlan -nɛ 'a- kɛ -na -zian' kö n -wun 'yi -yö 'kan -a 'dhi bhë. =Ya kɛ 'dhö, kö -a kɛ 'pö 'a- wo -na kö 'aan- kɛ mɛ -nu 'yan 'dhiö -së 'pö bhë -eɛ? =Ya kɛ -nɛ -yö 'dhö -bezë kö n 'ka kɛ yuö -kë Klito -dhë -mɛ 'ka gbɔ -nɛ bhë 'sa.

Pɔlö -bha -kë Dɛmɛ -bha bɔmɛ 'ka -kɔ

¹¹N dhegluzë -nu, a- -pö ka -dhë: 'Wuntaɔsë 'a- -blɛɛ' -na bhë, mɛ 'bhee- -de -gɔ -zotadhe 'yaa -mü. ¹²Yaa 'go mɛ gbɛ kwɛɛ kö -yaan -a nu n -dhë 'iin mɛ gbɛ kun 'ö n -daan -a 'ka; 'kɛɛ Yesu Klito -nɛ 'ö 'dhe bho -a -ta n -dhë.

¹³Ka gia-, -kɔ 'a -kaa' kö a -tun -klu -sü 'ka Zuifö -nu -bha -bhea' -kɔ -bha bhë ka- -wun -ma; 'ö -kɔ 'a -kë 'wun =wɔa' -dhia =faan' 'ka -Zlan -bha mɛ -nu -ta kö 'aan- -an 'gü -siö' bhë 'ka- =tɛi' dɔ. ¹⁴'Töng bhë -a 'ka, n 'bhame -nu 'wo -kë Zuifö 'ka 'pö bhë, a -kë 'gbee- -an -bha, Zuifö -nu -bha -bhea' -kɔ 'gü. N =zuö' -de -yö -luu yi 'bhema -nu wɔ -kɔ -wun 'gü.

¹⁵'Kɛɛ -Zlan -bha 'glusë 'gü, -yö n -sü 'ö n -ya -de -ta, -a -de kö a -tun n dhe 'guu, 'yö n -dhɔɔ -kë kö 'a yuö kɛ 'ö -dhë. ¹⁶'Ö =dhe 'ö yi 'ö- -ya kö 'wuntaɔsë 'ö -gban -a Gbö -bha bhë, -yaan -a -ta 'po n -dhë kö 'aan- -wun -blɛɛ'- mɛ -nu 'waa Zuifö 'ka -an -dhë bhë, 'ö =ya -lo, n 'ka 'dho mɛ gbɛ 'piö kö -yaan n -kpaɔ, ¹⁷'iin n 'ka 'dho Zeluzalemë, mɛ -nu 'wo -kë Yesu -bha bɔmɛ -nu 'ka n 'dhiö bhë -an 'piö kö -waan n -kpaɔ. 'Kɛɛ -dhe 'a go mü a -dho vɛedhö Alabi -sɛ 'gü -zian' (n 'sloo 'ka); 'ö -dhe 'a go mü, 'a dho Damasö. ¹⁸=Dhe 'ö -kwe -yaaga =ya ziö, 'a dho Zeluzalemë kö yië- Pieɛ 'yiën- -kpɛn yi 'kuë- 'yiën- yi 'ko dɔ. 'Ö yi -nu 'yi 'dhɔɔgɔ =plɛ -kë yi 'kuë- mü. ¹⁹Yesu -bha bɔmɛ 'bhaa gbɛ 'a dho -kpɛn -a -bha 'ma 'zü yaa -kë -dhö -a 'ke yaa kɛ kwa Dɛmɛ dheglu Zakö 'ka.

²⁰Pë -nu 'a -an -ya 'sëedhe -nɛ -a 'gü bhë, 'wun gia- -mü; -Zlan -de -yö n =goo- 'ka.

²¹=Dhe 'ma 'go mü, a -dho Sili -sɛ waa- Silisi -sɛ -an 'gü -dhe -nu -bha. ²²'Töng bhë -a 'ka, kö Klito -bha mɛ -nu -dho 'kuë- -sü 'wo Zude -sɛ 'gü bhë, -an 'yan yaa -kpɛn n -ma -kun. ²³Pë do 'ö -da -an 'toudhö 'wo- dɔ 'ö tɔɔ -wa -pö 'ö bɔ -na mɛ -nu 'dhii do do 'ka -nɛɛ: «Mɛ 'ö -kë 'wun wɔ -dhia -be kwa -ta 'wuntaɔsë -wun 'gü bhë, yö -nɛ 'ö 'wuntaɔsë 'ö -gban -zo -yö Yesu -bha -sü -bha bhë 'ö- -wun -blɛɛ' -na zlöö bhë; 'kɛɛ kö -yö -kë 'slë -suu'- 'saadhö =mɛɛ' =dhia -be kö -yaan -an 'gü =siö'-.» ²⁴'Ö =ya kɛ 'dhö, 'wo -Zlan 'tɔ -kë =va n -wun 'gü.

Pɔlö -bha -dho Zeluzalemë -gen

2 ¹=Dhe 'ö -kwe 'gɔɔ- do 'ö ga -yiisië =ya ziö, a -yɛ n 'zü 'a dho Zeluzalemë -dëüwo, yië- Baanabasö yi 'ka, 'ö 'a Titö kpa n -ma. ²'Dho

'a- wo bhë 'ö tɔɔ -Zlan =ne 'ö- pö n -dhë 'dhö. 'Yö -dhe 'a dho 'a -lo 'ma, 'ö yië- 'dhiö -sü me 'ka -me -nu 'yi -ya 'kuë- -kë yi 'sloo 'ka, 'ö 'wuntaasë 'a- =blee' -na me 'waa Zuifö 'ka -an -dhë bhë, 'ö- gɔgɔ -nu 'wo- -ta, 'a- sü 'a- =blee -an -dhë; -yö -kë 'dhö kö yi -nu yi -wo -yaan kë -a 'gü do, -kun -kë 'ö ma yuö -nu dho to 'kpaan. ³'Këe Titö, 'yö -kë n 'piö, 'yö -kë Glekö 'ka bhë waa- 'gbee- -ta bho kö -yaan 'dho 'böng. ⁴'Këe dhegluzë =suazë -nu -wo -kaan yi 'ka -yö kë 'dhö kö me -nu -waan 'dho 'böng, dhasü 'gbloo 'piö. Me -nu 'wo bhë, -wo -da yi ziën =ne -glunaakëme -nu 'dhö kö -potaasü 'ö yi -gɔ Yesu Klito 'gü bhë -waan -a 'piö -ga; bhii pë 'ö -kë -an -zo 'piö -be 'ö tɔɔ kö 'yiën- kë -an -kɔ -löö. ⁵'Këe yiëë 'töng 'bhe 'tee gbë nu -an -dhë, -yö kë 'dhö kö 'wuntaasë 'ö 'wun gia- 'ka bhë 'yiën- -a -wun 'to pin =taa ka -dhë.

⁶'Këe me -nu 'ö 'wo -kë =ne 'dhiö -sü me 'ka -me -nu 'dhö bhë, pë 'wo dho -a =blee' -n -dhë -yaan kë pë -dëü 'ka yaa kë -dhö. -A -de pë 'wo- 'ka, n 'to -de yaa kë -a 'piö, bhii -Zlan 'yaa me -ga mebbeedhe bun -bha. ⁷'Këe -wa -yö =zian' =ne -Zlan =ya 'wuntaasë bhë -a -wun -lo n kwëe kö 'a- -wun =blee' -me -nu 'waa Zuifö 'ka -an -dhë =ne -kɔ do gia- 'ö- -wun =blee' -sü tën -a 'ka Pieë -bha Zuifö -nu -bha 'ka bhë -a 'dhö, ⁸bhii -Zlan -yö n -ya kö me -nu 'waa Zuifö 'ka bhë 'aan- kë böme 'ka -an 'piö =ne -kɔ 'ö Pieë =yaa' kö -yaan kaa böme 'ka Zuifö -nu 'piö bhë -a 'dhö. ⁹Zakö 'dhö, Pieë 'dhö waa- Zan 'ö -an -ya 'ti -yö -kë =ne -gɔme -nu 'dhö bhë, wo gia- -wa -dɔ =ne -Zlan -yö yuö 'ö -ya -sü 'ka -de -ta bhë -a -wun -tën n -ma. 'Yö 'wo wo -kɔ -sɔ ma 'dhö, Baanabasö 'dhö yi kwëe, -a -zɔn -sü 'ka =ne yi -mɔ -sü 'ka -a 'gü do kö 'yiën- 'kan yi 'kuë- kö 'yiën- 'dho me -nu 'waa Zuifö 'ka -an 'piö, kö wo -zë -waan 'dho Zuifö -nu 'piö. ¹⁰'Yö 'wo- pö yi -dhë yi -zo -yö -büö wo -bha 'fëeme -nu -wun 'ka. Pë 'a- -de -kë yö -mü.

Pölö -bha -we Pieë -dhë -gen

¹¹-Dhe 'ö Pieë -yö nu Antiosö, a 'wun -blee -a 'ka me gbung 'gü 'ö tɔɔ -yö -kë 'wun =zaa' -sü 'gü. ¹²-A -kë 'dhö -gen tɔɔ: =Dhe 'ö me -nu 'ö Zakö -yö -an bɔ bhë 'ö waa -lo -kun, -yö -kë pë -bhö -dhia dhegluzë -nu 'ö 'waa Zuifö 'ka -an 'piö; 'këe =dhe 'ö me -nu 'wo bhë 'wo -lo, 'yö -kan pë -bhö -an 'piö -sü -bha, bhii -yö -suö me -nu 'wo Zuifö 'ka 'ö 'wo bɔ 'wun 'ö -gban -dho 'böng -sü -wun -bha -a 'ka bhë -an -dhë. ¹³'Yö dhegluzë -nu 'wo Zuifö 'ka bhë, 'wo yö -ziö Pieë 'piö -sü -bha 'suö 'ka. Baanabasö -de 'pö -yö -to -an 'piö -an -bha 'suö bhë -a 'gü. ¹⁴-Dhe 'a- yö =ne 'waa 'ta 'sü -kɔ kpengdhö kë -na =ne -kɔ 'ö 'wun gia- 'dhoë- 'ka 'wuntaasë 'gü bhë -a 'dhö, 'a- pö Pieë -dhë me 'plë wö 'dhiö mü =nëe: «Bhi 'ü Zuifö 'ka, 'ö- -dhe =ya -glɔɔ 'ö 'bhaa Zuifö -nu -bha tɔng -löö gbɔ -potaasü 'ö ü -gɔ 'wuntaasë -wun 'gü bhë -a -wun 'gü, -yö -kë -dhë 'ü- 'piö kö me -nu 'wo =ne -wo Zuifö -nu -bha tɔng =bhlë -ya 'zü ii?»

'Wun 'ö -gban dha -kɔ -bha

¹⁵Yi gia- 'yi Zuifö 'ka 'yi bhɔa, 'yiëë tɔng -lö 'gü -me -nu 'ka =ne 'sëgɔ gbë 'gü -me -nu 'dhö. ¹⁶'Këe yi- -dɔ =ne me -bha -kë kpengdhö -sü 'ö -Zlan

wö 'dhiö bhë -yö -sü dosen -a -bha -zo -yö Yesu Klito -bha -sü -bha, yaa 'sü -a -bha täng 'kun -sü -bha. Yi -de 'pö, pë 'yi- -kë kö 'yiën- -tun kë -na kpengdhö -Zlan wö 'dhiö yö kun tɔɔ täng 'kun -sü; 'kɛɛ 'we 'yi- wo Yesu Klito -wun -bha 'ö 'yi yi -zo yö -a -bha bhë -a -wun -mü; 'ö tɔɔ mɛ gbɛ 'ka 'dho kë kpengdhö -Zlan wö 'dhiö ö -bha täng 'kun -sü -wun 'gü. ¹⁷Ya kë -nɛ yi 'ö 'yi- këdhe -mɛɛ' -na kö 'yiën- kë kpengdhö -Zlan wö 'dhiö, yië- Klito -nu yi -bha -kë do -sü -wun 'gü bhë, 'yië kë -sɔɔnyaakëmɛ -nu 'ka, kö Klito -ya kë -sɔɔn yaa -gen -gban -dhe 'ka; 'wun -yö -gɔa' -kɔ 'yaa kë 'dhö! ¹⁸Ya kë -nɛ pë -nu 'a- -wüü bhë, 'ma- pö 'a- dɔ 'zü, kö kë 'pö 'a- wo 'wun -ma täng -ta -mɛ 'ka bhë -aa? ¹⁹Wun mɛ 'ö -gban täng -bha bhë, a ga -sü 'ka -a -gɔ, 'ö bhii -dhe 'maa täng -bhlë -ya bhë, täng -de gia- -ya za -lo n tuö, kö -yö kë 'dhö kö 'a -kë -a 'gü -sü kë -Zlan -bha 'ka. Yië- Klito -nɛ 'wo yi dɔ -gaatalü -bha, 'yi ga bhë; ²⁰ya kë 'dhö kö ma gia- 'maa -tosiadhe kë -sü 'gü gbɔ, 'kɛɛ Klito -nɛ 'ö -tosiadhe kë -na n 'gü bhë. -Tosiadhe 'yö n -gɔ zlöö bhë, a- -kë -zo -yö -Zlan Gbö 'ö n -dho -kë 'ö ö -de nu n -wun 'gü bhë -a -bha -sü 'ka. ²¹N 'ka -duë -Zlan -bha 'glusë -dhë. 'Kɛɛ -ya kë -nɛ mɛ -bha -kë kpengdhö -Zlan wö 'dhiö -sü -yö -bɔ täng -ta, kö Klito -yö -ga 'kpaan 'sa!

**-Zoyösü waa- täng 'kun -sü, pë -plɛ 'wo bhë
-a -mlë 'ö dhasü -yö sü -a -bha -ɛ?**

3 ¹Öö, Galatö -mɛ -nu, 'kaa 'wun dɔ -dhɛɛ! Dö 'pö ka 'bɔnkan bhë? 'Kɛɛ kö ka 'ö 'ka bhë, Yesu -bha -ga -gaatalü -bha -sü bhë -a -wun -yö -bho 'kou ka -dhë 'papadhö ka 'yaan. ²Dhɛɛ' do 'kpaan -yö n -gɔ. -Zuu 'slöösLö 'ö go -Zlan 'piö bhë -a yö 'ka- wo -nɛ, täng 'kun 'pö 'ka- wo bhë yö -mü 'iin 'wuntaɔsë -dhe 'pö 'ka- wo 'wun gia- bhë yö -mü -ee? ³Ka -dɔ -gbɔudhö -dhë? -A zü 'ka- dɔ -së 'ka -Zuu 'slöösLö 'ka bhë, ka -dho -a 'dhiö to zlöö ka -de -faan' 'ka a? ⁴Wun -nu 'ka bɔ -an 'gü bhë, 'to 'pö 'dhoë- wo 'dhö 'kpaan bhë -a? Këpë 'yaa -mü 'sa! ⁵-Zuu 'slöösLö 'ö -Zlan -ya nu ka -dhë, 'ö -dhidhaapë -nu kë -na ka ziën bhë, täng 'pö 'ka- kun bhë yö -mü 'iin 'wuntaɔsë -wun 'ka- ma 'ö 'ka- -wun -dhe 'wun gia- bhë yö -mü ee? ⁶-Ka -dhe -ga 'dhe! Pë 'ö -bɛɛn' -sü 'ka 'ö -gban Ablaamö -bha -ya -pö: -Yö ö -zo -yö -Zlan -bha 'ö -Zlan -ya yö mɛ kpengdhö 'ka; 'kɛɛ kë- wo 'dhö bhë, -yö -sü -a -bha -zo yö -sü -bha. ⁷-Dhe -kë 'dhö, -yö kë ka 'yaan -nɛ mɛ -nu 'ö -zo yö -Zlan -bha -sü 'dhoë- -an -gɔ bhë, Ablaamö gbö giagia -nu -nɛ 'wo bhë. ⁸Pë 'ö -bɛɛn' -sü 'ka -ya -pö -Zlan -yö -dho mɛ -nu 'waa Zuifö 'ka -an kë kpengdhö ö wö 'dhiö, 'kɛɛ -yö -dho sü -an -bha -zo yö -sü -bha; 'wunsë 'ö bhë 'yö- to 'dhiö 'ö- -blɛɛ Ablaamö -dhë -nɛ: -Zlan -yö -dho bɔ ü 'gü 'yö 'dhuë- kpɔ 'sɛgɔümɛ -nu 'saadhö 'wo 'kpongtaa -an -bha. ⁹Wun bhë Ablaamö -ya -dhe 'wun gia-; 'yö -Zlan -yö 'dhuë- kpɔ -a -bha. Mɛ -nu 'saadhö 'ö 'wo 'dhoë- wo -zo yö -Zlan -bha, 'dhuë- -dho kpɔ -an -bha -nɛ -kɔ 'ö kpɔa Ablaamö -bha bhë -a 'dhö.

¹⁰Me -nu 'wo wo -zo yö -na tɔng 'kun -sü -bha bhë, 'dhangga -yö -dho -an kun. Bhii pë 'ö =been' -sü 'ka -ya pö: «Pë -nu 'wo -ya -sü 'ka tɔng 'sëédhe -be 'gü bhë, me 'ö yaa 'dho -a do -bhlë -ya, 'dhangga -ya 'kun.»
¹¹-A -de -a -ta -yö 'po -sü 'ka =ne me gbe 'ka 'dho kë kpengdhö -Zlan wö 'dhiö ö -bha tɔng 'kun -sü -wun 'gü; bhii pë 'ö =been' -sü 'ka -ya -pö: *Me 'ö 'dhoë- kë kpengdhö -Zlan wö 'dhiö ö -bha -zo -yö -Zlan -bha -sü -wun 'gü, -yö -dho -kë -a 'gü -sü yö.* ¹²'Kee -kwa -dhe -ga -a 'gü -së 'ka; tɔng 'kun -sü -wun yaa 'go -zo -yö -Zlan -bha -sü 'gü. 'Ö tɔ pë 'ö =been' -sü 'ka -ya -pö -zian' =ne: *Me 'ö 'dhoë- tɔng =bhlë -ya ö 'plë 'ka, -a -bha -kë -a 'gü -sü -gen 'godhe =ne ö bhë.* ('Kee kö 'pian do 'piö, =ya kë =ne kwa -kɔ yaa -mɔa -bha, kö 'dhangga -yö kwa -ta.)

¹³'Dhangga 'ö -ya kwa -bha -be bhë, =ya -ya Klito -bha kwa pin =taa. -Kɔ bhë =ne 'ö Klito -yö kwa dhaa 'dhangga 'ö kwa kun tɔng -wun 'gü bhë -a -gɔ; bhii pë 'ö =been' -sü 'ka -Zlan -bha 'sëédhe 'gü -ya -pö: *Me 'oo me 'ö 'wo -dɔ -gaatalü -bha, kö 'dhangga =yaa- 'kun.* ¹⁴-Yö -kë 'dhö kö 'dhuë- 'ö -Zlan -ya 'tɔ go Ablaamö -dhë ('ö -gban Yesu -wun -dhe 'wun gia- -sü -bha dhasü -wun 'gü) bhë -yaan nu 'pö me -nu 'waa Zuifö 'ka -an -dhë -bɔ Yesu Klito -ta -sü 'ka 'iin kö kwa -bha -zo yö -sü 'gü kö -Zuu 'slööslö 'ö -Zlan -ya 'tɔ go kwa -dhë bhë, 'kwaan- yö.

Tɔng waa- pë 'tɔ 'go -wo -an dɔ -kɔ

¹⁵N dhegluzë -nu, -ka ka 'to 'to 'dhe! 'Wun =zuan' do =ga =ne: =Ya kë =ne gɔɔn- do -yö ö -bha 'wun -kaanta -nu =blee' -na -mɔ 'kuë -sü -zë 'ka, me gbe yaa 'dho kë -dhö kö -yaan yö züë- 'iin kö -yaan -wo 'waa gbe -zuö -a -ta. ¹⁶=Ao! -Ka dɔ! -Zlan -yö ö -bha pë 'tɔ -go Ablaamö 'dhö waa- ö =suu'- -ta -në -an -dhë. Pë 'ö =been' -sü 'ka -Zlan -bha 'sëédhe 'gü yaa- pö: *Kaa- ü =suu'- -ta -në ka -dhë* =ne -dhe 'wo- pö -a -bha 'kpa me -plëézë -mü -a 'dhö. 'Kee -ya -pö: *Kaa- ü =suu'- -ta 'në ka -dhë.* =Yaa- pö 'dhö kö -ya -pö me dosen; me dosen bhë 'ö tɔ Klito. ¹⁷'Ma- pö 'dhö kö a- -pö: -Zlan -yö pë 'tɔ 'go -wo -nu (Ablaamö -dhë), 'yö- pö -yö -dho to pin =taa. Tɔng 'ö nu kö -kwe -këng' -yiisië 'ö -kɔ -yaaga =ya ziö bhë yö 'pö 'yö dho -Zlan -bha pë 'tɔ 'go -wo bhë -a yö züë- kö -yaan -a -bha pë 'tɔ 'go -wo -nu 'to 'kpaan bhë =ee? ¹⁸'Kee =ya kë =ne gbaö 'ö -Zlan dho -a nu =ne -to me -gɔ -pë 'dhö bhë =ya 'sü tɔng -bha kö yaa 'sü pë 'tɔ 'go -wo -bha gbaö =ne bhë 'sa. 'Kee kë- wo 'dhö bhë 'tɔ -go me -dhë -pë bhë =ne 'ö -Zlan -yö bɔ -a -ta 'yö ö -bha 'glusë -kë Ablaamö 'ka.

¹⁹=Dhe -kë 'dhö =ne tɔng -yö -dɔ -më -wun 'gü i? Nu 'ö tɔng -ya wo 'ö -daa -ta bhë, -yö -nu 'dhö kö 'wun -nu 'waa -Zlan -zo 'kun -wun -zian -ta bhë kö -yaan kë kö me -nu -waan dɔ, -yaan kaa 'dhö -bezë -yaan 'dho -yaan yöë Ablaamö =suu'- -ta -në 'ö 'wun -yö -gban -a -bha 'ö 'wo- 'tɔ go bhë, -a -bha nu -sü -bha. -A -de -Zlan -yö -bɔ ö -bha bɔme -nu 'gü 'ö tɔng dɔ, 'ö me do -ya -wun -lo me -nu -bha; ²⁰'kee -dhe 'ö -Zlan 'dhoë- ö -bha pë 'tɔ go (Ablaamö -dhë), yaa bɔ me gbe 'gü.

Tɔng -da -gen

²¹Kè- wo 'dhö bhë, kè 'pö tɔng -ya wo -ɔ -Zlan -bha 'tɔ 'go -mɛ -dhë -pë -gɔ 'yënnɔ -pë 'ka bhë =a? Yaa 'dho kè 'dhö 'dhe! 'ö =ya kè -nɛ tɔng -yö -kè -dhö 'ö mɛ -nu -wo bɔ -a -ta 'wo -kè -a 'gü -sü yö kö mɛ -yö -dho -mɔa -be -yö kè kpengdhö -Zlan wö 'dhiö tɔng 'kun -sü -wun 'gü. ²²Kɛɛ pë 'ö =bɛn' -sü 'ka -ya -pö, 'kpongtaame -nu 'töüdhö -wo =ɔɔn yaa -bha 'piigbeedhe -löö, -yö kè 'dhö kö gbɔɔ 'ö -Zlan -ya 'tɔ go bhë -yö kè mɛ -nu 'wo 'dhoë -wo -zo yö Yesu Klito -bha bhë -an -dhë.

²³Dhe 'ö =tun -be kö -zo -yö Yesu Klito -bha -sü 'töng yaa -lo =kun, kwa -kè tɔng -gɔ -kanso 'gü 'ö toë 'dhö 'ö -zo -yö -Zlan -bha -sü -yö yöë plaan. ²⁴Tɔng -bha -kè 'yan -to kwa -bha -mɛ 'ka -gen 'ö =kaa' bhë ö =ga bhë. 'Yö -kaa' 'dhö 'ö dhoë 'ö yöë yi 'ö Klito -yö nuë 'ö 'kwa =kaa' kpengdhö -Zlan wö 'dhiö kwa -bha -zo yö -sü -wun 'gü bhë -a -bha. ²⁵Zlöö =nɛ, -zo -yö Yesu Klito -bha -sü 'töng =ya -lo. Pë 'ö ö 'yan to kwa -bha -be bhë, 'kwa -kɔ -löö gbɔ.

²⁶Ka 'saadhö ka -bha -kè -Zlan -bha 'në -nu 'ka -sü -yö -bɔ ka -bha -zo -yö Yesu Klito -bha -sü -ta. ²⁷Ö tɔɔ kè- wo bhë ka 'plɛ 'töüdhö -wo ka -bɔ yö kö kaa- Yesu Klito -nu 'kaan- kè do; 'go mü 'zü, 'ö 'ka -tosiadhe -dëü 'ö Yesu Klito 'gü bhë, 'ka- -da ka -bha. ²⁸Ya kè 'dhö kö -nii gbɛ 'yaa Zuifö -nu waa- mɛ -nu 'waa Zuifö 'ka -an ziën; 'yaa =nua -nu waa- mɛ -nu 'ö -potaasü 'dho -an -gɔ -an ziën; 'yaa gɔɔn- -nu waa- dhoo -nu -an ziën. Ka 'saadhö ka -kpa 'kuë- -sü -mü do Yesu Klito 'gü. ²⁹Ya kè -nɛ 'ka kè Klito -bha 'ka kö ka Ablaamö =suu'- -ta -nu 'ka, 'ö -to mɛ -gɔ -pë 'ö -Zlan -ya 'tɔ go -a -dhë bhë 'ö 'ka dho -a yö.

4 ¹-Ka ɔɔ, 'a 'wun =zuan' do -zɔn. 'Në gɔɔn- 'ö -dë -bha pë -nu dho to -a -gɔ -yö =nɛ =nua 'dhö; bhii 'kö -kè =nɛ yö =nɛ 'ö =ya 'to zlöö pë -nu 'wo bhë -an dɛmɛ 'ka, -a -bha -kè 'tee -sü -wun 'gü, -a -kɔ 'yaa pë -nu 'wo bhë -an -ta. ²'Töng 'ö -dë -ya -ya bhë, =ya kè -nɛ yaa -lo =kun, kö -yö -tun mɛ -nu 'wo wo -zo kè -na -a 'piö bhë -an kwɛɛ, -a -bha -kè 'tee -sü -wun 'gü. ³Kwa -de 'pö, -kɔ gia- bhë =nɛ 'kwa =kaa' kö kwa =tun =nɛ 'në 'sɛɛn- -nu 'dhö bhii kwa kwa -zo 'plɛ ɔɔ Zuifö -nu -bha tɔng -nu waa- -an -bha pë -nu kè -kɔ -nu -bha ('ö tɔɔ kwa -de 'pö -yö -kè kwa -zo 'piö =nɛ pë -nu bhë =nɛ 'wo dho kwa dha -be). ⁴'Kɛɛ =dhe 'ö yi 'ö- kɔɔ bhë =ya -lo, -yö ö Gbö -bɔ; 'yö bɔ dhebɔ do 'gü 'yö bhɔ. Yö -de 'pö -yö -kè Zuifö -nu -bha tɔng =löö. ⁵-Yö kè 'dhö kö mɛ -nu 'wo -kè tɔng =löö bhë -yö -an bho 'gan 'gü, -kɔ bhë =nɛ 'ö 'kwa =kaa' -Zlan gbö -nu 'ka.

⁶Pë 'ö -zɔn =nɛ ka ('dhö, yi 'dhö, kwa 'saadhö kwa) -Zlan gbö -nu 'ka bhë 'ö tɔɔ -Zuu 'slööslö 'ö go -a Gbö 'piö bhë -a -ya 'ö- wo kwa =zuö' 'piö bhë; bhii kè- wo bhë, -Zuu 'slööslö bhë, =ya kè -yö -we =woë' =nɛ: «N Dë!» ⁷Ya kè 'dhö, kö 'kaa =nua 'ka gbɔ, 'kɛɛ 'ka kè zlöö -a gbö -nu 'ka. 'Yö =dhe -kè =nɛ 'ka kè -a gbö -nu 'ka bhë, -Zlan -yö -dho ka gbaa pë -sɛɛbɔ -nu 'wo -gɔ 'wo -ya -sü 'ka ka -bha 'ka bhë -a 'ka.

'Wun 'ö Pölö =zuö' -to zlöö -wun 'ka Galatö -me -nu buëndhö

⁸Kë- wo 'dhiö =zian' -be bhë, kaa -Zlan dɔ; ka -kɔ kɛpɛ -nu -nɛ 'ö 'ka -an -ga -Zlan 'ka, 'yö 'ka -kɛ -an -gɔ =nuadhe 'gü 'kɛɛ kö 'waa- 'ka. ⁹Zlöö -nɛ bhë, =dhe 'ö 'ka -Zlan giagia dɔ, 'iin 'ö -Zlan =ya ka dɔ bhë, -yö -kɛ =dhë 'zü 'ö 'ka =dhië -de nu -a -dhë -pɛ 'tëëtɛ -nu 'ö 'wo mɛ 'bhee- -bha wɔ -kɔ 'gü bhë -an 'piö e? -Yö -kɛ =dhë 'ö 'ka dho -an 'piö 'zü kö -waan ka =nuadhe -kɛ wo =e? ¹⁰-Ka -dhe -ga bhë 'dhe! Ka -dhekpaɣi 'bhaa -nu, 'su 'bhaa -nu, -kwe 'töng 'bhaa -nu waa- -kwe 'bhaa -nu -wun -kun 'gbee- -a 'bhaa -nu -bha. ¹¹'Suö -yö n -kɛ ka -wun 'gü 'ö tɔɔ =ya kɛ a n -de =dhɛɛ' kɔ 'a- pö kö yuö -nu 'a- -kɛ ka -wun 'gü bhë 'to 'pö 'dhoë- wo 'kpaan bhë =e?

¹²N dhegluzë -nu, =bhea' -a- wo ka -dhë; -ka kɛ =nɛ -kɔ 'a- 'ka =nɛ -a 'dhö bhii 'maa tɔng =löö gbɔ.

¹³Kaa 'wun yaa gbe kɛ n 'ka. Ka gia- -yö =tun ka 'yaan =nɛ 'töng 'ö 'wuntɔsɛ bhë 'a- =blɛɛ -a 'ka ka -dhë 'ma -blɛɛzë 'ka bhë, 'yua -yö -kɛ n kɛ =dhia. ¹⁴'Yua -bha n kɛ 'ö- wo 'töng bhë -a 'ka bhë, -yö -kɛ ka -gɔ 'wun 'gbee- 'ö nu ka -ta -a 'ka, 'kɛɛ kaa n -san zë. Pɛ 'ka- -kɛ =zian' 'ö tɔɔ n -nia 'kun 'ö 'ka- wo =nɛ =dhe 'wo- pö -a -bha -Zlan -bha bɔmɛ -mü 'iin Yesu Klito -mü -a 'dhö. ¹⁵'Töng bhë -a 'ka, =zuögludhi -yö -kɛ ka -gɔ. =Dhe -kɛ 'dhö, -më 'pö -kɛ kaa =ɛ? 'Kɛɛ a -mɔa 'a- pö: 'Töng bhë -a 'ka, =ya kɛ =nɛ ka -kɔ -yö -mɔa -be, ka -dho ka 'yanga -nu bho mü 'ka n gbaa. ¹⁶Dɔ 'kwa- wo =nɛ, kɛ 'pö 'ma- wo ka yaagümɛ 'ka 'wun gia- =blɛɛ' -a- wo bhë -a -wun 'gü bhë ee?

¹⁷Me -nu 'wo- 'piö kö 'ka tɔng 'kun ö 'plɛ 'ka bhë, ka -wun -yö -an -gɔ 'gbee-; 'kɛɛ -an =zuö' 'piö -wun 'yaa -së. Pɛ 'wo- 'piö 'ö tɔɔ 'ka 'kan n -ma kö 'ka ka =zuö' =dhië' -an 'piö. ¹⁸=Dhe 'a- -ga -a 'gü bhë, =yö -së kö 'ka ka -zo 'tɛn pɛ -nu -dhë, 'kɛɛ -yö kɛ pɛ 'ö -së -a -wun 'gü 'iin kö -yö kɛ 'dhö -kɔplawo; kö -kun 'ö -kɛ n -ma -kɛ ka ziën -sü 'töng 'sloo 'ka. ¹⁹Ma 'në -nu -wungbeezë, n 'yënnɔ -yö bhɔ -na ka -wun 'gü =nɛ pɛ 'wo- pö 'në 'kɔɔ -sü 'yënnɔgbɔdhe 'ö dhebɔ -gɔ -a 'dhö; 'kɛɛ -yö -dho toë 'dhö 'ö dhoë 'ö yöë yi 'ö Klito dho -kian -a 'ka ka 'gü bhë -a -bha. ²⁰Dɔ 'a- wo =nɛ, n -ya -sü -mü -a =wuën' kö 'a nu ka 'piö 'ma kö 'aan- 'wun =blɛɛ' -ka -dhë -kɔ 'bhaa gbe -ta bhii pɛ 'a dhoë- kɛ zlöö ka -dhë 'maa- dɔ.

'Wun =zuan' 'ö -gban Agaa waa- Saala -an -bha

²¹Me -nu 'ö 'ka- 'piö kö 'ka kɛ tɔng =löö =nɛ, -ka ka 'to 'to 'dhe! Pɛ 'ö tɔng -ya pö bhë, ka- -ma -a? ²²-Ya -pö Ablaamö -bha 'në -nu -wo -kɛ =plɛ. -A me do -yö -kɛ =nuadhe do ('wo- -dhe Agaa), -a gbö 'ka, 'ö- mɛ do 'bhaa -yö -kɛ dhebɔ 'ö 'yaa =nua 'ka ('wo- -dhe Saala bhë), -a gbö 'ka. ²³'Në gɔɔn- 'ö waa- =nuadhe 'wo- kɔɔ bhë -yö -bhɔ =nɛ -kɔ 'ö =kaa' -an medhe =dhɔɔbhaa 'ka -a 'dhö; 'kɛɛ -a mɛ 'ö waa- dhebɔ 'ö yaa kɛ =nua 'ka 'wo- kɔɔ bhë, -yö -bhɔ =nɛ -kɔ 'ö -Zlan -ya 'tɔ goë Ablaamö -dhë bhë -a 'dhö. ²⁴'Wun bhë -wo -mɔa

-wa ma -ne 'wun -zuan' 'dhö. 'Kwa -dhe -ga 'wun bhë -a 'piö, dhebo -ple 'wo bhë, kwa -dho -an -zön -dhi 'kuë -ple 'ka. -A do 'ö 'kwa- -zön dhebo me 'wo- -dhe Agaa -a 'ka bhë, yö -ne 'ö tɔɔ -dhi 'kuë 'ö -kë Sinai -tɔn tuö. Yö -ne 'ö 'në -nu kpɔ 'ö 'wo -kë -nua 'ka. ²⁵Agaa bhë, yö -ne 'ö tɔɔ Sinai -tɔn 'ö Alabi -se 'gü; yö -ne 'ö 'töng 'kwa dɔa -dɛɛ -ne -a 'gü 'ö tɔɔ Zeluzalemë 'ö waa- ö -bha 'në -nu 'ö 'wo (Moizö -bha tɔng -gɔ) -nuadhe 'gü. ²⁶Kɛɛ Zeluzalemë -dhe me 'ö dhang- 'gü bhë -ne 'ö -potaasü 'dhoë- -gɔ. Yö -ne 'ö tɔɔ kwa dhe. ²⁷Bhii pë 'ö -bɛɛn' -sü 'ka -ya -pö: *Dhebo, bhi ü 'ka 'në gbe 'kpa bhë, -bhö =zuögludhi kë; bhi ü 'ka bɔ 'në 'kpa -sü 'yënnghodhe 'gü do -ne, -bhö 'we =zuögludhi -tan -nu 'ka! Bhii -saandhe bhë -a -bha 'në -nu -wo -dho kë =va 'wo -zië' dhebo me 'ö -tun kun -së bhë -a -ta.*

²⁸Kɛɛ n dhegluzë -nu, ka -zë ka 'në -nu 'ö -Zlan -yö -an 'tɔ go 'ö 'ka bho -an 'ka -ne Izaakö 'dhö. ²⁹Kë- wo 'kpa bhë, 'në 'ö bho -ne -kɔ 'ö -kaa' me 'bhee- -dhɔɔbhaa 'gü -a 'dhö bhë -yö -kë -a me 'ö bho -Zuu 'slööslö -kwa' bhë -a 'klo bho -dhia -ne -kɔ 'ö- 'ka -dɛɛ -ne -a 'dhö; 'ö 'dho -na -a 'ka 'dhö 'dhiö -kplawo bhë. ³⁰Kɛɛ pë 'ö -bɛɛn' -sü 'ka -ya -pö: *-Bhö -nuadhe waa- ö -bha 'në -an kë; bhii -nuadhe -bha 'në bhë, pë 'ö yö 'dhö waa- dhebo 'ö 'yaa -nua 'ka, -a -bha 'në 'dhö 'ö -an dë -bha pë -nu 'ka, -a -bha 'yaa- 'gü.* ³¹-Ya kë 'dhö kö, n dhegluzë -nu, 'kwa -nuadhe -bha 'në -nu 'ka, 'kɛɛ kwa dhebo -potaasüzë -bha 'në -nu 'ka. (-Ya kë 'dhö kö pë 'ö -Zlan -ya 'tɔ go bhë, kwa -dho -a yö.)

Me -kpaɔ -wo 'ö -gban -potaasü -bha

5 ¹Klito -yö -potaasü -nu kwa -dhë kö -potaasü giagia -yaan kë kwa -gɔ. -Potaasü 'ö ka -gɔ bhë, -kaa -wun 'kun 'gbee-, 'go mü 'ka ka -zo kë ka -de 'piö kö -kun 'ka dho kë 'zü -nua 'ka.

²-Ka dɔ! Ma Pɔlö -me a- -pö ka -dhë: -Ya kë -ne 'ka 'dho 'böng (-a pö -sü 'ka ka -zuö' 'piö -ne yö -ne 'ka dho bɔ -a -ta kö 'kaan- dha), kö Klito -yöë -bha -pë gbe 'yaa 'dhö -ne bhë 'sa. ³A- 'piö 'a bɔ -a 'gü 'zü 'a- yö sia- ka -dhë -së 'ka -ne: Me 'oo me 'ö 'dhoë- 'wun -yö 'ko 'dhiö -kɔ -suu' -bhë -a kë ö -zuö' 'piö kö -yaan 'dho 'böng, kö -a 'gbee- -ta bho -sü -mü kö -yaan tɔng -to 'dhö -sü 'plë 'kun. ⁴-Yö kë ka 'yaan -ne me -nu 'ö 'ka- këdhe -mɛɛ' -na kö 'kaan- kë kpengdhö -Zlan wö 'dhiö ka -bha tɔng 'kun -sü -wun 'gü bhë, 'ka 'dho Klito 'ka -gbiin; -Zlan -bha 'glusë 'ö bhë 'ka ka -de 'kan -a -bha -ne bhë. ⁵Me -nu 'kwa to bhë, kwa -zo yö -sü -mü -ne -Zlan -yö -dho kwa kë kpengdhö ö wö 'dhiö. Pë 'ö kwa -bha -zo yö -sü 'gü 'ö -Zuu 'slööslö 'dhoë- kë -na 'piigbeedhe 'ka kwa -zuö' 'piö bhë 'ö bhë. ⁶Bhii 'ö tɔɔ -ya kë -ne 'kwa kë Yesu Klito -bha 'ka, 'kö -kë -ne kwa -dho 'böng oo, kwaa 'dho 'böng oo, kwa 'to 'ka 'dho kë mü: Pë me 'ö- -wun 'dho 'gbee- dha -sü 'ö bhë -a 'gü 'ö tɔɔ -zo -yö -Zlan -bha -sü 'ö -ya kë me -gɔ 'ö 'wo pë -nu kë -na -dho 'gü bhë.

⁷-A zü dɔ -kɔ -blɛɛzë 'ka- zü dɔa bhë, -yö -kë -së. -Dhe -kë 'dhö -ne dö 'pö- -kë 'ö 'ka ka bo 'wun gia- -bhlë -ya -sü 'ka ɛ? ⁸Pë 'ö me -nu -wa -blɛɛ

kö 'kaan- ka -zo tèn -a -dhë bhë, -Zlan 'ö ka =dhɔɔ kē -na bhë, yaa 'go -a 'piö. ⁹Pë -de 'ö -kë 'ö mē -nu 'dho -piën bɔ -na 'wo- pö -na: «=Bluubhæepë 'bhle 'tee -yö =bluu'- -to 'dhö -sü -da 'ö bhë.» (Bhii mē do =ya kē ka ziën kö -a kēwun -yaan kē ya; -yö -dho mē 'plē -gɔ 'gü =siö'-.) ¹⁰'Këe kē- wo 'dhö bhë, -Zlan -yö =zuöyagluu -nu n -dhë ka -wun 'gü bhii -ya -kë 'ö n =zuö' -yö -kë -saa =nē 'wun 'ö bhë, ka 'dhö, ma 'dhö, kwa =zuö' -ya 'gü do. 'Këe mē 'oo mē 'ö ka =zuö' =kaan' -na 'kuë bhë, -Zlan -yö -dho -a 'klo bhɔ.

¹¹Ka- -yö bhë =a, n dhegluzë -nu; 'ö =ya kē =nē kē- wo bhë -dho 'bɔng -sü =nē 'a- -wun =blæ =bezë =nē -a -wun -yö 'gbee- dha -sü 'gbloo 'piö, kö -wo -dho n 'klo bhɔ -be -a? =Ya kē =nē -yö -kë 'wun gia- 'ka -bezë kö 'wun 'ö -gban Klito -dɔ -gaatalü -bha -sü -bha bhë 'a- -wun =blæ' -na bhë kö yaa 'dho yē mē gbē -bha. ¹²-A -de a- 'piö kö mē -nu 'wo bhë, -wo 'dho 'wun bhë -a 'ka =gbiin -wa ziö =gɔü', -wo wo bo -kë gɔɔn- 'ka -sü 'ka.

¹³N dhegluzë -nu, ka -zë, -Zlan -yö ka =dhɔɔ -kë kö 'kaan- kē -potaasü 'gü. 'Këe kö =kun 'ö -potaasü 'ö bhë 'ka- -kë =saandhepë 'ka ka -de -gɔ 'ö 'ka ka -bha -tosiadhe =kaa' ka =dhɔɔbhaapë -nu 'gü. 'Këe -ka dɔ, -dhɔ -yö yö ka -dhë 'dhiö kö 'kaan- yuö kē ka 'ko -nu -dhë. ¹⁴Bhii tɔng -nu 'wo bhë 'kwa -an 'plē 'dho 'kuë- -wo do 'ka, -ya -pö: -*Bhö ü -ya 'yɔɔ -dhɔ kē =nē ü -de 'dhö.* ¹⁵'Këe =dhe -kë =nē ka kē -kɔ -nu =wa kē =nē wü -nu kē -kɔ 'dhö ka 'ko -nu -gi -sü 'iin ka 'ko -nu 'yënnng bhɔ -sü -nu 'ka bhë, kö -ka ka -zo kē ka -de 'piö kö -kun 'ö 'ka dho ka 'ko -nu 'gü =siö'!

-Zuu 'slööslö -bha -yö mē -dhë 'dhiö -sü

¹⁶=Éé, =ya kē 'dhö, a- -pö ka -dhë: -Ka ka =kwaa'- -Zuu 'slööslö -zü -yö yö ka -dhë 'dhiö ka -bha -tosiadhe 'gü; kö =kun 'ka 'wun ma ka mēbheedhe =dhɔɔbhaapë -nu -ta ka 'gü; ¹⁷bhii 'ö tɔɔ mēbheedhe =dhɔɔbhaapë -nu -wo -de -ta; 'waa -Zuu 'slööslö -bha zian -ta; -kɔ do bhë 'ö -Zuu 'slööslö 'dhoë- 'ka mēbheedhe =dhɔɔbhaapë -nu 'ka; -wo -de -ta 'gbönggböng. =Ya kē 'dhö ka 'ka 'dho -mɔa -bha kö pë 'ö -dhi ka -dhë 'kaan- kē. ¹⁸'Ö =ya kē =nē -Zuu 'slööslö =nē 'ö yö ka -dhë 'dhiö, kö 'kaa tɔng =löö.

¹⁹Kwa gia-, -kwa -dhe -ga 'dhe! Mē 'ö ziö -na ö -de =dhɔɔbhaapë -nu yaa 'piö bhë, -a kēpë -nu 'saadhö -wo -gban =sɔɔn kē -sü, -dhuupë -nu, =sɔɔn yaa kē -sü 'ö 'wo 'to -na -a dīn 'piö 'wo 'dho -na -a 'ka 'dhiö -kplawo, ²⁰pë gba -sü -nu waa- =dē bɔ -sü -nu; kö mē -nu -wo =glueng' kē -na wo 'ko -nu -bha, -yö 'gla -na -an -gɔ =druei 'gü, -wo -da -na -naazuédhe 'gü wo 'ko -nu buëndhö, -wo 'dhinaa -nu kē -na, -wo kē -na yaagüme -nu 'ka wo 'ko -nu -dhë; kö 'gügludhe -yö -da -na -an ziën kö -wo 'pē -na 'gü. ²¹-Wo -ya -sü 'ka mē 'waa gbē -bha pë -dhɔ 'ka; -wo wo -de -nu -drɔɔn mü -sü -dhë, -wo =kian' yaa -nu -kë, 'wo 'wun 'vlanvlan 'bhaa -nu -kë -ziögɔsüzë 'ka. 'Këe a ka =kpaɔ -na 'zü =nē -kɔ 'a- =kaa' 'dhiö bhë -a 'dhö. Mē -nu 'wo wɔ -kɔ =suu'- bhë, 'wo- kē -na bhë, wo 'ka 'dho -da -Zlan -bha -gludëdhe -pö 'gü.

²²'Këe mē 'ö -Zuu 'slööslö 'dho 'dhiö 'sü -na -a 'ka -a kēpë -nu 'wo tɔɔ -dhɔ, =zuögludhi, =zuöyagluu, =zuösaadhe, kēwun -së -nu, 'glusë, -to -wo

'gü -sü, -kë 'lëälë -sü waa- -de kuënnu -sü. ²³Pë -nu 'wo bhë 'saadhö me 'ö =ya 'to -a 'gü, 'klobhɔdhe 'ö sü tɔng -bha bhë, yaa 'dhö nu -a -ta. ²⁴Me -nu 'wo Yesu Klito -bha 'ka, mɛbheedhe =dhɔɔbhaapë -nu 'wo bhë =wa ga -an -dhë 'ö bhii =waa- kpa Yesu Klito -bha, =waa- dɔ -gaatalü -bha. ²⁵-Zuu 'slöösLö =ya kwa gbaa -kë -a 'gü -sü 'ka; kö kwa -dua' -mü 'kwa kwa =kwa' -zü -yö yö kwa 'ta -sü -kɔ -dhë 'dhiö kwa -bha -tosiadhe 'gü 'pö 'sa. ²⁶Kö -kun 'ö 'kwa -kë -desüvame 'ka, 'ö 'kwa kwa 'ko -nu =woo' =mɛɛ 'iin 'ö 'kwa -ya kwa 'ko -nu -bha pë -nu -dhɔ 'ka.

-Ka 'dho ka 'ko -nu -dhë

6 ¹N dhegluzë -nu, =ya kë =nɛ =wa mɛ do 'kun 'wun =zaa' -sü kë -sü -ta, mɛ 'ö -Zuu 'slöösLö 'ö go -Zlan 'piö 'ö ka 'gü bhë, -kaa kë -yö yö zian kprengdhö -ta; 'kɛɛ -kaa kë 'lëälë 'ka. -A 'bhaa tɔɔ: Mɛ 'ü -dhö, ü -zo kë ü -de 'piö kö -kun 'ö 'ü zian -po 'güdandhe -gɔ 'ö bhi -de 'pö, 'ü =sɔɔn yaa -kë. ²-Ka 'dho ka 'ko -nu -dhë 'wun 'gbee- -nu 'gü; -kɔ bhë =nɛ 'ö 'ka dho Klito -bha tɔng kun -a 'ka. ³-Ya kë =nɛ mɛ =ya ö -de sü pë 'bhaa 'ka 'kɛɛ kö 'yaa pë gbɛ 'ka, kö ö -de -püö 'ö- wo. ⁴Mɛ 'ö -dhö, -yö ö -de 'ta -kɔ -ga; 'ö =ya kë =nɛ =ya ö -de 'ta -kɔ -ga 'ö dho kë 'gɔugɔ -a -wun 'gü kö -yö -dho ö -de -zɔn ö -de 'ka, 'kɛɛ yö 'ka 'dho ö -de -zɔn mɛ gbɛ 'ka; ⁵'ö tɔɔ mɛ 'ö -dhö, -yö -dho ö -de -bha =kwɛɛ- bun.

⁶Mɛ 'ö 'wo ka =daan' -na 'wuntaɔsë 'ka bhë, kwa =dua' -mü kö pë -nu 'wo ka -gɔ bhë, 'ka -an -bha nu 'pö.

⁷-Ya kë 'dhö, (n dhegluzë -nu), -kaa kë 'slë 'ka ka -bha -tosiadhe kë -kɔ 'gü; 'ö tɔɔ 'waa 'yee 'to -Zlan -bha. -Ka -dhe -ga 'dhe! Pë 'ö mɛ -ya ta =nɛ 'ö- -kan. ⁸-Ya kë =nɛ pë 'ö mɛbheedhe bun -dhë -së =nɛ 'ö mɛ -ya -kë, kö yi 'dhiötöyi =ya -lo, -a -bha -dho kë ga 'ka; 'ö =ya kë =nɛ pë 'ö -dhi -Zuu 'slöösLö -dhë =nɛ 'ö- -kë, kö =toëpö -këdhösü =nɛ 'ö dho kë -a -gɔ. ⁹Kö -kun 'ö kwa -kɔ 'yi -yö ga 'wun -së kë -sü 'ka. Bhii -kɔ bhë =nɛ 'ö 'dhuë- -pë -nu 'wo -ya kwa -gɔ bhë -a yi =ya -lo, 'kwa dhoë- yö; 'kɛɛ kö kwaa 'to zian 'klüë-. ¹⁰Kö -dhe 'ö 'töng 'dhö =tun kwa -gɔ bhë, -kwa 'wunsë kë mɛ 'plɛ -dhë; 'kɛɛ =yö -së kö -yö kë dhegluzë -nu 'ö -zo -yö Yesu -bha -sü 'dhö -an -gɔ -an -zian'.

-Zo -kë -de 'piö -wo -nu waa- =wekadhe

¹¹-Ka -dhe -ga bhë 'dhe! N pë =bɛɛn' -kɔ pin 'gblöögblöö -nu 'wo =nɛ -ka -an -ga bhë 'sa!

¹²Mɛ -nu 'saadhö 'wo- 'piö kö -wo -gban ka -bha kö 'ka 'dho 'böng bhë, 'wo tɔɔ mɛ -nu 'ö 'wo- 'piö kö 'wo wo -de kë 'gianzë mɛ 'bhee- -nu wö 'dhiö. Kë- wo 'dhö bhë -wa -kë 'dhö kö -kun 'ö mɛ -nu dho 'wun wɔ wo -ta Klito -bha -gaatalü -wun 'gü. ¹³Mɛ -nu 'wo bɔ -dho 'böng -sü 'ka bhë wo -de gia- 'waa tɔng 'kun; 'kɛɛ -wa 'piö kö 'ka 'dho 'böng -yö kë 'dhö kö -yaan kë -an -bha -de -sü =va -gen 'ka, =duakëpë 'ö -kë ka kwi 'gü bhë -a -wun 'gü. ¹⁴N

-ma 'ka, pë do 'ö- -wun 'gü 'a dho n -de kë 'gɔugɔ, 'ö tɔɔ Dëmë Yesu Klito -bha -gaatalü -wun. -A -gen tɔɔ Klito -bha -gaatalü -wun 'gü, 'kpongtaadhe 'yaa n -dhë pë gbe 'ka gbɔ. 'Ö ma -de 'pö, 'ö 'ma kë -bhaazë 'kpongtaadhe -dhë. ¹⁵Wun 'ö -gban -kë 'bɔn 'ka -sü waa- -kë =druen 'ka -sü 'ö 'ka -an -ga -na bhë, n 'to 'yaa- gbe -dhë; pë mɛ 'ö- -bhlë 'dhö -dhö =zian' 'ö tɔɔ kë 'ö 'kwa- wo mɛ -lü -dëü 'ka bhë -a -wun. ¹⁶Wun mɛ 'ö -kë -kë mɛ -lü -dëü 'ka -sü -wun 'ka bhë, mɛ -nu 'saadhö 'wo 'to -na -a 'piö bhë, wo 'dhö waa- -Zlan -bha mɛ -nu, kö =zuöyagluudhe waa- -Zlan -bha 'glusë -wo 'to -an 'piö!

¹⁷Kö -dhe =kpaɔ =dhia' -bha, kö =kun 'ö mɛ gbe -yö n 'yënnɔ bhɔ gbɔ bhii 'ö tɔɔ 'kpa -nu 'wo yɔn n bun -bha =nɛ, -wa -zɔn =nɛ a Yesu -bha =nua 'ka.

¹⁸Dhegluzë -nu, kwa Dëmë Yesu Klito -bha 'glusë -yö 'to ka 'piö! Amen.